

靜  
志  
居  
詩  
話

靜志居詩話卷二十

秀水朱竹垞先生著

扶荔山房編

陳繼儒字仲醇松江華亭人有胤公全集

仲醇以處士虛聲傾動朝野守令之臧否由夫片言詩文之佳惡冀其一顧市骨董者如赴舉良史摧場品書畫者必求張懷瓘估價肘有兔園之冊門闔驚羽之車時無英雄互相矜飾甚至吳綾越布皆被其名竈妾餅師爭呼其字今遺集具在未免名不副其實焉

小舜年字孟碩吳江人嘉興縣學生有綠曉齋集

孟頫家居盛澤幼赴嘉興童子試時安福顏欲章知縣  
事亟賞其文拔置第一遂補諸生讀書東塔寺尋游陳  
仲醇之門負才傲世恒衣茜衣入市題其門曰鄉人皆  
惡國士無雙惟與同里張汝培端甫結契時相和酬孟  
頫既失意坎壈不平傲屈平楚辭作滔滔章假帝詔河  
伯之文有曰東聯滄汶兮南絡沅湘黑者錯白兮弱者  
間強災既淪於人坎兮害乃基於剝牀翹商羊之子舞  
兮又安覩儀鳳之蹠蹠固帝心之欣禍兮亦今俗之好  
殃又聞杜松劉挺二將喪師賦長謠千餘言以詬楊鎬

平居好結客客至必留坐是奇窘或三日不爨終不乞  
米於人也詩尙崛奇間有合律者黃浦晚度云殘照收  
黃浦孤舟何處依沙昏秋雁落潮滿夜漁歸薄海山川  
曠前途廬舍稀帆輕天路近直與鶴俱飛

施武字魯孫別字百靈長洲人崇禎間游于滇有

楚游草西覽篇

魯孫孝子佯狂翫世善草書鄭孝廉士敬謂曰君書直  
逼二王不雜唐宋以下筆法魯孫大喜於同人廣坐中  
徧題箋扇呼士敬曰君頗知書吾書究誰似士敬謬曰

靜志居詩話

卷二十

十一 抄功山房

今日書不見佳魯孫臆目左右視擲筆而去嘗語人曰  
吾於詩極力摹擬古人僅可雜之王仲初集中耳今吳  
人罕有知之者處士金侃亦陶藏其橐經侯官曹能始  
墨筆點定子亟錄十三首滇黔風景可得其大槩焉烏  
鴉關云朝上烏鴉關暮下烏鴉關老鴉啼啞啞行人還  
未還關索嶺云高嶺呼將軍將軍祀其上行入仰望時  
白雲隔千丈相見坡云上坡面在山下坡山在面相見  
令人愁不如不相見鳳羽詞云鳳羽低連鄧睢川山頭  
流水屋邊田額尖新樣姑姑帽五月羊皮帶汗穿

自注  
鳳羽

山名鄧睽詔名姑姑帽滇人皆以羊皮繫額寒暑皆披

街子詞云豬街纔罷又龍

街蠻女牽羊入市來背上擔兒嘗慣負胭脂落盡小桃

開自注滇中以作市曰街子逢辰丑戌未日爲期

土官出山詞云嗚嗚牛角滿

山陂腰下橫刀弩箭隨雜部椎頭皆束帛阜綾纒額長

官司

自注土官惟參謁官長始冠帶居常但用阜綾青布裹頭

煮鹽詞云使君不及

鬱林廉舊例逡巡新例添白井爭如黑井好一斤水煮

半斤鹽

自注滇中鹽井四惟黑白二井課稅甚多餘不及焉

出獵詞云秋高出獵

草根枯漫縱韓盧不用呼新襲土官誇武健側身馬上

獲雙狐歸化詞云鴛鴦夢斷絲樓空馬首蕭蕭故向東

歸化寺前多少淚年年三月蜀茶紅

自注滇中山茶天下第一惟歸化寺

者其本合抱花大如孟國初以前物也往來宦遊羈客留別交好至此莫不墮淚

麗江詞云麗

江水繞雪山寒郡縣羈縻異國看千里羅步

地名無貢賦

黃金有價不輸官

自注麗江府即古峯國地也地寒五穀稀少惟產良金毛布之類方伯用

貢金必索其直從來直指公皆不按其地聽之而已人皆耳上貫環好衣紅與西域相類永昌詞云

漢武窮邊開永昌哀牢部落散丁當流人不學花蠻語

城郭風烟半建康

自注永昌古哀牢國也國初流配獨多吳人故語言風俗宛似南都爲滇

之首寶井詞云緬中花落滿蠻山千兩鴉青馬上還寒

食雨飛防瘴癘漢人不敢出姚關

自注寶井在姚關萬里外非容易至販賣

者止於緬中交易緬中多瘴癘除三冬與初春通夷者不敢出鴉青寶名時適有是寶重一兩三錢價三十貫賣雪詞云雙龍關裏百花香銀海逶迤抱點蒼六月街頭教賣雪行人錯認是瓊漿自注大理蒼山雪六月不化市上女郎賣之猶吳下之賣冰也

卓人月字珂月仁和人貢生有蕊淵集

珂月才情橫溢所撰續干文穩帖而奇肆詩亦不爲格律所拘贈女鬟紅衣云石家醋醋喜穿緋裹手擎觴率意飛坐上恨無姜石帚長歌一曲惜紅衣

林雲鳳字若撫長洲人



清言  
卷二  
一  
若撫當鍾譚餓張之日守正不回詩篇極其繁富惜知  
者寥寥困阨終老相如遺草已不可問矣憂邊一律云  
絲綸閣下議東征爲遣元戎出大明邊月曉懸弓劍影  
朔風秋散鼓聲聲滄溟萬里波臣國紫塞三千浪子兵  
秦凱未聞糧援絕不知平壤幾時平

項真字不損秀水儒學生貢入國子監有西湖草  
不損以門才自豪兼綜今古文深爲李長蘅聞子將所  
賞有御史巡按至浙試士子文經書發題外俾作一詩  
題是賦得多雨紅榴折不損書法絕倫以行草縱筆寫

之同學慮御史必怒咸爲不損危而御史竟拔置第一  
益自負儻不羈入修門坐事瘐死于獄予嘗見其爲  
閨人銘梳奩曰人之有髮旦旦思理有身有心奚不如  
是筆法極其飛舞釋其語殆亦非真狂生也

吳拭字去塵休寧人有遺藁

附錄朱子蓉云去塵夙饒于貲破產結客贈予手製  
麋丸不啻沈珪對膠也客金陵遍題十寺廊壁七言  
如花雨已過寒食後風箏又傍社壇斜蠻鄉有夢三  
千里闔海無書二十年半偈歲深香積飯一番春老

木棉衣移家轉近寒山寺探篋惟餘秋水篇衣上露  
涼飄柏葉鬢邊霜重壓蘆花誦之神采溢目無題和  
斗生云海外雲生碧浪陰蘋鱗蒼雁總浮沉寥寥天  
漢雙星小寂寂梨花一院深貞玉有光還易見明珠  
無定杳難尋輕鸞欲繡愁無力除是靈芸七孔鍼巫  
山遠在暮雲中愁隔春燈一點紅莫道金刀難剪水  
須知絛扇也驚風化爲蝴蝶飛纔並除是鴛鴦睡不  
同最是游絲無賴甚又牽春去過牆東

沈章字宗玉嘉興人國子監生有苧莊集

上舍爲亡弟千里婦翁詩頗崛竒所居苧莊略約相通  
環以水竹余嘗讀書其地今其二子皆登鬼錄遺書莫  
可問矣

李肇亨字會嘉嘉興人太僕日華子有寫山樓率  
圃夢餘諸草

吾鄉鮮巖壑之勝然園亭之參錯水木之明瑟舟楫之  
沿洄縱游覽所如而不倦萬歷以來承平日久士大夫  
留意圖書討論藏弄以文會友對酒當歌鴛社之集譚  
梁生偕會嘉和之先後賦詩者三十三人事未百年而

閭閻故老已莫能舉其姓氏玉杯錦席之地皆化爲宿  
草荒煙惟李氏寫山一樓尙未椒飛粉落宛然靈光之  
在魯錄珂雪之作不禁憮然

秦徵蘭字楚芳常熟儒學生

德陵實錄爲黑頭爰立者所攫天啓四年七年事遂爾  
遺佚秦秀才宮詞拮據禁庭瑣語頗稱詳核第合而觀  
之嫌其述客魏居多而事關德陵者寡不無微憾耳天  
啓宮詞云紅粉排班玉輦旁西園花柳踏春陽中宮侍  
從偏無幾窄袖高鬟一樣妝

自注張后性淡靜愛憎稍  
與衆異客氏教宮人效江

南作廣袖低髻尤爲后所厭薄春秋佳日駕幸西苑等處坤寧宮侍從多不踰三四十輩其妝束如圖畫所見古人像客氏石梁深處夜迷藏霧露溟濛護月光捉得往往目笑之

御衣旋放手名花飛出袖中香

自注乾清宮丹陛下有老虎洞不知所始洞背

爲御街洞中甃石成壁可通往來上嘗于月夕率內侍賂迷藏爲戲潛避其內諸花香氣上所篤愛時采一二

種貯襟袖間故聖駕敷武外輒識之以芳芬襲人也內河環遶禁城邊疏鑿清瀾

勝昔年好是南風吹薄暮藕花香拂白鷗眠

自注神廟靜攝年久

紫禁城內河壅淤不通德陵復令疏浚之春夏之交景物尤勝禽魚菱藕儼若江南

聖主多能絕

代姿罷朝常是運斤時裕妃笑指燈屏問雕到寒梅第

幾枝

自注裕妃未罹禍時宸眷獨寵上好雕鏤木器護燈小屏八幅手刻寒雀爭梅戲界諸少璫合鸞之

仍論以御制之物價須一  
萬翌日如數奏進大悅

琉璃波面浴鷗鳧艇子飛來

似畫圖認著君王親蕩槳滿隄紅粉笑相呼

自注上數  
偕中官汎

葉舟于西苑手操  
篙櫓去來便捷

美人睂黛月同彎侍駕登高薄暮還

共訝洛陽橋下曲年年聲遶兔兒山

自注兔兒山卽旋  
磨臺乙丑登高聖

駕臨幸鐘鼓司掌印官執板唱洛陽橋記攢睂黛鎖不  
開一闕次年復如之宮人知書者相顧疑怪非特於景  
物無取語意實近不祥也風掠輕舟霧不開錦鱗吹裂  
不期月而鼎湖龍逝矣

綵鱗摧須臾一片歡聲動捧出真龍水面來

自注乙丑  
端午駕幸

西苑用綵繪飾小舟首尾爲龍形上手持划具同少璫  
劉思源高永壽蕩漾橋北怪風忽起雲霧四塞舟覆二  
璫淪死管事譚敬匍  
匍赴救扶駕出水冰鴨銀苗院院同鵲橋衣卸巧山

空晚涼供罷波羅蜜去看河燈萬點紅自注七夕節各宮立乞巧山子  
宮眷衣鵲橋補自初一起至十四止中元節食銀苗菜  
藕之嫩芽也水鴨先一夕煮熟凝成膏者甜食房進供  
佛波羅蜜西苑作法事放河燈已上數條宮中舊  
例惟宮人內官深夜相攜看河燈則辛酉後事也

徐仲選字華海一字鶴友海鹽人國子監生有鶴

友詩彙

鶴友近體刻意學陸務觀水邨云照檻晴光眼未迷瘦  
藤斜影度橋西沙頭白鴨黃鵝睡籬畔瓜棚豆架低屋  
似魚船疎荻繞亭如僧笠稚松齊此鄉風景真堪戀只  
合攜餅坐菜畦



嚴焯字子尹常熟人有南虞小草

子尹詩律頗細如詠雪云竹上有聲如雨夜庭中無月亦明時令永嘉四靈見之定把臂入林也長相思云長相思在夢中自君之出羅幃空牕前浙浙來朔風滿天霜雪鳴孤鴻楓林青兮關塞黑終然萬里魂難通長相思何時終初夏偕顧魏二子游西關云散步西郊任所之雨餘新綠倍濃時同遊此日還同散明日分飛各不知

馮元仲字次牧慈谿人有天益山房詩集

都城西山宏教寺傳是正德間中貴晏忠所造寺前有  
澗過澗壘石爲門題曰道統門石殿三楹上琢三皇五  
帝三王像左鑿周召孔孟諸聖賢右鑿周程張朱諸儒  
像別一石龕以藏五經殿外一石亭壁列鐘簋干戚錢  
鏹弁裳之屬左龍馬馬毛旋五十五數具一如河圖右  
龜龜甲四十五數具一如洛書東堂三楹壁列忠臣龍  
比以下孝子曾閔以下若干人按元史泰定二年中書  
省言養給軍民必藉地利世祖建大宣文宏教寺寺賜  
永業當時已號虛費今遺蹟已無可考觀晏公祠石象

禮器制度渾朴不類明時匠人所鑿且元於儒釋初無所分疑寺卽宣文宏教之遺址晏忠特從而修飾之爾金華姜給事應甲詩云空山石祠堂落穆跨深壑肖象古聖賢高下坐淵漠殿堦列龜龍如出自河洛煌煌先儒語所爲忠孝作性理累百卷題壁見大略歷覽感吾心人傳晏公鑿厥志在尼山高邈得所託媿哉彼檀施粵血塗丹牖則竟以爲長侍所鑿次牧題晏長侍祠云嗚呼晏長侍石室存道統上像皇帝三其左周召孔朱之四大儒一一接其踵峩峩殿三楹像皆刻石奉四壁

龕者五分標五經總古人所未聞此是我作俑猗彼何  
人斯卓哉儒者勇亦沿其誤至云古人所未聞此是我  
作俑不知祠宇列聖賢像始於文翁踵於趙岐漢之遺  
碑若司隸校尉魯恭荊州刺史李剛從事掾武梁祠皆  
有刻石聖賢像非作俑比也

丁元公字原躬嘉興布衣晚爲僧號願菴

原躬負奇恒與俗齟齬書畫俱入逸品兼精繆篆詩亦  
不屑作庸熟語題畫木芙蓉云吹邊鯉魚江岼風露條  
霜蕊一叢叢謝家池上秋容瀾十里長隄間白紅

馮夢龍字猶龍長洲人由貢生選授壽寧知縣有

七樂齋彙

明府善爲啓顏之辭間入打油之調雖不得爲詩家然亦文苑之滑稽也冬日湖邨卽事云蒹葭一望路三义遙認莊窩去路斜舟響小溪過蟹舍屋顏高岼露牛車輕霜隄柳餘疎葉暖日邨桃放早花平野蕭條聊極目遠天寒影散羣鴉

孫承宗字稚繩高陽人萬歷甲辰賜進士第二除

編修歷坊局以禮部右侍郎掌詹事府拜兵部

尚書兼東閣大學士奉命督師出鎮山海加太子太保尋加少傅兼太子太傅文華殿大學士再加少師兼太子太師予告回籍崇禎二年仍起督師又三年復予告歸七年高陽失守入城南老營望闕拜叱持纆者縊死贈太傅諡文忠

有南陽集

先生自任天下之重盡瘁師中司馬之檄方馳樂羊之篋已滿見危授命無媿全人集中三十五忠詩蓋有感於璫禍而作三十五忠者趙尚書南星高總憲攀龍周

侍郎炳謨楊副院璉馮副院從吾何總督士晉左僉院  
光斗李御史應昇夏御史之令周中丞起元繆宮諭昌  
期蘇考功繼歐張尙書問達汪侍郎輝丁檢討乾學鄧  
中丞漢袁御史化中吳總督用先顧憲副大章王尙書  
紀魏給事大中鄒總憲元標王侍郎之案周主事順昌  
夏文選嘉遇周御史宗建周罔少朝瑞黃御史尊素劉  
知府鐸萬郎中燦吳御史裕中張都事汶趙宗伯秉忠  
公侍郎鼎孟參軍淑孔也東林之君子已得十八九焉  
先生之言曰起三十五人于九京未必人人大有勳烈

而有勳烈者必此三十五人痛惜人才之至矣

劉振之字而強慈谿人崇禎庚午舉人署東陽儒  
學教諭遷鄞陵知縣辛巳十二月城陷不屈爲  
賊支解贈太僕寺卿有畫溪近草水壺先生遺

藁

先生初署廣文日以忠孝勉諸弟子題官舍之柱曰人  
熱難囚吾鼎可愛又曰一片冰心堪贈友滿腔熱血欲  
輸君其後捐軀最烈不食其言闕湖卽事云秋容到處  
好碧水湛晴暉嶺樹陰逾密湖雲溼不飛亭虛山易入



野曠鵲忘歸戶外塵雖滿那能上芟衣登青笑臺云樓  
陰倒映水潺潺簾卷空青鳥乍還一幅雲林難著筆半  
沉半露霧中山

蔡道憲字元白號江門晉江人崇禎丁丑進士除  
大理推官改長沙癸未八月城陷被執不屈爲  
賊所磔事聞贈太僕少卿諡忠烈有悔後集

江門自序悔後集云悔後者何前日妄作詩今而後悔  
也悔後而復有集者何吾但能焚前日之詩今日之作  
且輯之以竢後日之再悔也其虛懷可見詩雖音節未

諸而清婉越俗如移竹已抽三尺筍種桃爭發一庭花  
又湘水清紫藤花落魚子生皆不失爲佳句送堵牧游  
入覲云十月迎君南千里送君北一歲雙酒卮隨君變  
顏色誰能入長安便無故人憶下有洞庭上湘江爲我  
留君不可得我在南君在北夢相思見顏色他鄉飯君  
強食歌再歌中歎息

范景文字夢章吳橋人萬歷癸丑進士授東昌推  
官擢吏部主事歷員外郎中移疾歸起太常少  
卿尋以僉都御史巡撫河南升兵部侍郎轉南

京都察院右都御史尋升南京兵部尙書坐劾  
時相除名爲民已復起工部尙書拜東閣大學  
士京城陷拜闕號哭投井死初諡文貞順治初  
定諡文忠有水餐堂章

啓禎之際秦聲變而至文天瑞楚調變而至尹宣子越  
吟變而至王季重正音掃地矣吳橋博綜舊章領袖羣  
雅其詩發揚而不厲新警而不佻獨自成家不飲狂泉  
之水有感云天啓嗣祚年臺諫氣色盛憂危叫九閣所  
恃上神聖何來連斥逐無乃累新政薄謫亦主恩敢廢

天子命所虞端一開庶言疑欲屏中璫思乘墉况可授  
以柄於惟我神皇高拱握金鏡稍稍視下輕釀成結轄  
病今誰秉國成借之弄機弄罪人佚顯罰反憾言官諍  
漆室抱深懷能不心怲怲尙慎一怒加撫茲萬邦正

倪元璐字玉汝號鴻寶上虞人天啓壬戌進士改  
庶吉士授編修歷侍講南京國子監司業右中  
允左諭德右庶子國子監祭酒升兵部右侍郎  
改戶部尙書兼禮部尙書翰林院學士京師陷  
自縊死初諡文正定諡文貞有憶草

歷日之頒明太祖定於九月之朔其後改十一月朔繼  
又改十月朔遂爲定制是日帝御殿比于大朝會士民  
拜于廷者例俱得賜倪尙書天啓中賦頒律詩最爲典  
重他詩過於新奇不然也尙書晚築室于紹興府城南  
隅廳檻法式皆手自繪畫巧匠見之束手旣成始歎其  
精工時方患目疾取程君房方于魯所製墨塗壁默坐  
其中堂東飛閣三層扁曰衣雲凭闌則萬壑千巖皆在  
鳥下適石齋黃公至越施以錦帷張燈四照黃公不怡  
謂國步多難吾輩不宜宴樂尙書笑曰會與公訣爾旣

此行遂殉寇難閣順治初尙存曩嘗攜舍弟千里暇輒  
登焉今已鞠爲荒草矣皇極門頒歷云鳳闕開彤旭貌  
爐散紫烟六階齊度緯七政轉璣璿甲歷龍躔改寅賓  
象魏懸明時功在革資始義承乾黑帝威初試青皇位  
早傳周官新月令甘氏舊星篇人繼羲和後書成冀英  
前庚先三日戒貞下一元旋圖籙符垂赤干支德應元  
興王惟省歲太史又編年賜出黃星曜披看綠字鮮因  
知天歷數如日起虞淵

孟兆祥字允吉交河人天啓壬戌進士除大理評

事升吏部主事歷郎中謫行人司副尋遷光祿寺丞轉少卿左通政太僕卿通政使官至刑部右侍郎甲申三月守正陽門城陷不屈死贈尙

書初諡忠貞定諡忠端

孟公峻節自樹取忤中璫卒殉節于正陽門子章明顯之以進士觀政吏部視公殮畢亦自盡時論翕然以爲三百年特見之事初贈河南道御史諡節愍順治九年定諡忠僖其詩文惜無存

凌義渠字駿甫烏程人天啓乙丑進士除行人選

授禮科給事中歷兵科都給事中升福建右參政轉湖廣按察使山東右布政使入爲大理寺卿京師陷自經初諡忠清定諡忠介有使岷臺

凌公詩義見者解頤嘗與閔文學元京共排續湘烟錄董上舍斯張稱其冷豔畢廬比之吳均入東記及官禮垣封事四十餘上皆切中時弊溫輔以吏才稱之轉外溫旣謝政入爲大理臨難之頃從容就義惟悉取平生撰述焚之爲可惜也公清介特甚田廬一無所遺身後

二十餘年猶未并椁江都吳綺園次守吳興時夫人閔



尚存園次肅拜堂下秋深矣尙衣葛衣練裙退而歎息  
恒以鹽豉魚菽遺之且卜地葬公于驥邨之北爲文祭  
之

施邦曜字爾韜餘姚人萬歷己未進士武學教授  
遷國子監博士歷工部主事員外郎中出知漳  
州府升福建參政轉四川按察使福建右布政  
使南京光祿寺卿擢左副都御史殉國難初諡  
忠介定諡恭愍

浙人不幸萬歷以來執政者前有四明後有烏程德清

以是朝士不附東林者槩目之曰浙黨此指一時阿比  
執政者而言則可爾東林諸君子全倚浙人助之人品  
蓋棺論定試觀建文壬午崇禎甲申殺身成仁潔已自  
靖者惟浙爲多順治九年定諡甲申殉難文臣計二十  
人而浙居其六繼此授命者更難悉數浙黨之目庶幾  
可以一洒矣恭愍從容自經書其案云慙無半策匡時  
難唯有孤忠報國恩蓋初不以詩名而自饒方格

馬世奇字君常無錫人崇禎辛未進士改庶吉士  
授編修累遷左春坊左諭德兼翰林院侍講甲

申京師陷自經死初諡文忠定諡文肅有集

馬公清德奉使諸藩餽贈一無所受比還朝夢中吟文  
信國詩從今別却江南日化作啼鵲帶血歸蓋殉國之  
志已素定故先兆于夢云

周鳳翔字儀伯紹興山陰人崇禎戊辰進士改庶  
吉士授編修遷南京國子司業歷左春坊左諭  
德兼翰林院侍讀都城陷自經死贈禮部右侍  
郎初諡文節定諡文介有集

甲申三月之變文介授命獨遲十九日城陷語吳莊介

云臣子義在必死然必一視大行殯宮縞素慟哭方可  
無憾爾二十一日赴東華門茶棚下舉哀復匍匐至邸  
自經絕命詩云碧血九原依聖主白頭二老哭忠魂時  
親猶具慶也於時大學士宜城邱公瑜集議朝房俄而  
賊入亟走民家自縊爲旁人所持不死次日賊蹤跡得  
之挾入窩鋪求死不得賊帥劉宗敏刑辱備加猶嫚罵  
不屈伺守者稍懈乃就縊論者責其濡忍至受羣盜之  
侮不得與忠臣之列文介文華之哭旣不受賊帥之拘  
而萬舌一辭免腐儒吹疵之論是天所以成公大節而

公之素行交孚于鄉國故也不其難哉

劉理順字湛六杞縣人崇禎甲戌賜進士第一授  
修撰升左中允甲申殉國難初諡文正定諡文  
烈有劉文烈公集

劉公退朝賊騎猝入回寓舍書曰成仁取義孔孟所傳  
信公踐之吾何不然暨其妻妾竝縊可謂不負科名矣  
詩多直抒胸臆不爲體格所拘

附錄陳皇士云考宋元以來狀元及第死事者於宋  
得三人何奩文天祥陳文龍於元得三人李輔泰不

華李齊而明有五人靖難之時則有黃侍中觀土木之禍則有曹文忠禦北京之變則有劉公而浙東有余庶子煌江右有劉中允同升先後皆死國事此亦科名人物之盛軼於前代者也

吳麟徵字來皇號磊齋海鹽人天啓壬戌進士除建昌府推官丁憂起補興化徵拜吏科給事中歷都給事中升太常寺少卿京師陷自縊初諡忠節定諡貞肅有集

磊齋在八舍知無不言又明於當世之務不苟不吐奈

與執政齟齬不用其謀常與伯兄石匱書云朝廷之是非臧否無恒而所號爲正人專以門戶聲氣爲事疆場事日益決裂安之若固然惟一人焦勞於上而已又云近日用人倏更倏換當事全無確見惟視上意所在其餘議論紛紜封疆事所以日壞良可歎也又云宜興敗後大獄頻興士大夫幾無生氣而言路更甚弟幸免風波然欲積誠以冀匡救之萬一則未可得也又云闖賊破潼關直抵西安秦督三萬師一潰無餘獻賊破長沙進逼袁州江浙震鄰吾鄉恐未能安枕天下事有不忍

言者子姪輩教以敦厚毋事浮文爲善于鄉黨足矣其  
言一一切中時弊臨終處置家事各有條理從容不亂  
尤人情之所難能詩不甚敦琢其工者每涉傷時存其  
二首吉人之言不在多也

吳甘來字節之瑞州新昌人崇禎戊辰進士授中  
書舍人擢刑科給事中歷戶科都給事中甲申  
死寇難初諡忠節定諡莊介

思陵死社稷周文介欲哭殯宮而後死莊介口然其言  
而亟歸寓自縊時因哭殯宮而受榜辱者蓋不止邱輔



一人是則莊介之識遠也甲申之變諫垣數十人或竄或辱或汙僞命死節者僅莊介一人假踐文介之言安知不與邱輔同其辱乎君子論吳周兩公之死則先時者得其正矣

王章字漢臣武進人崇禎戊辰進士除諸暨知縣調鄞縣徵授工部主事選陝西道御史以憂歸服闋補河南道御史京城陷死之初諡忠烈定諡節愍有公餘草

王公赴義最烈公餘草詩一卷序者以吉光一片喻之

是年御史盡節者三人公與鄴陳公良謨零陵陳公純德也聞有昆明趙譔字鎮所天啓甲子舉人除貴州龍泉知縣以禦土寇功行取擢四川道御史巡視中城城陷爲賊所械瞋目大罵賊刀仗齊下殺於白帽衚衕其死與王公相類而遠方乙科無人爲之請卹國史野紀闕焉僅見於陳氏兩朝遺詩小傳特附書之

成德字元修懷柔籍霍州人崇禎辛未進士榜姓張有旨復姓除知滋陽縣事被逮杖謫久而赦還補如臬知縣入爲兵部主事轉員外郎甲申

殉國難贈大理寺卿初諡忠毅定諡介愨

元修牽絲作令不善事上官爲守所揭巡按以貪酷聞  
被逮按臣及守溫輔私人也元修母張具本聲寃於朝  
隨溫輔肩輿詆罵溫輔恚甚言於思陵杖之午門前下  
錦衣衛獄發遣時畱家人居順義城破衆爭匿地窖中  
元修父文桂曰豈可男女雜入一窟中乎賊至遂遇害  
一妹二妾皆自經及甲申就義母張暨一妹一妾亦俱  
縊焉絕句一首蓋謫戍日太行道中作也其辭云出山  
已定盟心語作令須思遺戍時但卷琴書賦歸去莫因

狗祿乞身遲

金鉉字伯玉畱守前衛籍武進人崇禎戊辰進士  
選揚州府學教授入爲國子監博士升工部主  
事尋改兵部甲申殉國難初諡忠節定諡忠潔  
有集

思陵之去閣黨無異拔山曾不數年命張彝憲總理戶  
工二部錢糧出帑金別建公廨俾諸司以屬吏之禮見  
金公再疏陳其不可謂以陛下迪簡之臣而令其罄折  
傴僂於刑餘之子不亦羞朝廷而辱當世之士邪思陵

卒不允也中官借驗火器劾公落職公笑曰吾去官遠此輩如脫蟻蝨垢膩之衣豈不愉快遂與諸弟講古文辭尤精研易理壬午七月晦讀邵氏書題其後曰甲申之春定我進退進雖遇時外而弗內退若苦衷遠而弗滯外止三時遠不卒歲優哉游哉庶畢吾世又語其弟曰吾平生寡所好視弃官如揮涕唾今以巡城每過御河輒畱連不能去何也卒沈於是從彭咸之所居公志蓋已先定矣

申佳允字孔嘉永年人崇禎辛未進士除儀封知

縣擢吏部主事轉員外降南京國子監博士遷  
大理寺副升太僕寺丞都城陷投井死初諡節  
愍定諡端愍有君子亭集

申公循吏治最中州及考牧近畿聞寇逼居庸郡縣望  
風奔潰或勸毋入都慷慨流涕曰固知京師不支如天  
子孤立何疾馳以入時三月十二日也徧謁大臣畫戰  
守策皆不省城陷自投王恭厰井中其詩娟秀不囂不  
浮近劉半舫一派贈郭子云下榻畱征騎燒燈共客吟  
萬金烽火信一夜故園心世事風塵老交情契濶深此

行須鄭重兵氣滿山岑

王與允字永錫一字百斯濟南新城人崇禎戊辰  
進士改庶吉士授湖廣道御史巡視河東鹽課  
陝西茶馬應天學政引疾歸甲申四月聞京師  
陷暨妻子登樓齊縊死有隴首集

新城王氏科第最盛盡節死者亦最多崇禎五年吳橋  
兵變南趨時則保定同知象復暨其子舉人與夔死焉  
十五年城再破時則貢生與朋暨其子舉人士熊生員  
士雅死焉至是侍御暨妻孥人子士和又死焉王氏

之門才甲一世矣

王士和字允協御史與允子新城儒學生

允協死不違親與孟忠僖比烈其妻於崇禎壬午城破時先自經忠臣孝子烈婦萃於一門尤難得也

許琰字玉重長洲縣學生贈五經博士

玉重青衿未受一命無必死之義而忠憤奮發始縊于家隨縊于福濟觀皆爲人救解復投胥門城濠時潞王舟泊城下遙望見之亟命水夫掖起抵家聞哀詔至宛轉悲號賦詩有一箇書生難殺賊願爲厲鬼效微忠之



句絕粒七日而歿先王重死者北京布衣贈中書舍人  
湯文瓊聞帝崩煤山書衣帶云位非文丞相之位心則  
文丞相之心慷慨自殺又聞金陵有丐者聞北京變搏  
膺大哭赴百川橋下死謝康樂詩所云本自江海人忠  
義感君子是也

王行儉字質行宜興人崇禎丁丑進士授南京戶  
部主事歷郎中出知荊州府改重慶甲申六月  
死寇難

張獻忠奪佛圖關用火具攻重慶時漢中已破瑞王來

奔關南道陳繻及隴右士大夫挈家從之城既陷賊俘  
巡撫陳士奇知巴縣事王錫暨太守王公縛之演武場  
將殺之俄而雷電晦冥獻忠對天詬曰我殺人與天何  
涉架飛礮向天齊擊之既霽諸公皆遇害事載婁東沈  
荀蔚蜀難紀略

王佐聖字克仲一字魯生長洲人萬歷壬子舉人  
除知遵義縣事崇禎壬午城破死于難有緘菴  
詩鈔

明季用人專拘資格吏部除目乙科多投之遠方如張

公季修王公克仲劉公而強馮公根公殉節皆最烈豈  
惟千佛名經中人始可入顯忠錄邪

吳爾燠字介子崇德人崇禎癸未進士改庶吉士

李自成陷京師從賊中脫歸依史可法軍死揚  
州之難有滋蘭堂初集聶許堂遺草

先生間道潛行依史閣部軍中以身許國遇鄉人祝孝  
廉淵南還斷一指裹家書中遺其親誓不空返卒死於  
兵平居曾撰死臣傳目曰仁書傳有小序各繫以古人  
日湛身日焚日炮烙日炙日自剄日不食日閉口日雉

經曰扼吭曰立槁曰沒陣曰觸曰墜曰鳩曰烹曰菹醢  
曰齣曰斬曰車裂曰磔曰鋸曰囊撲曰剝曰剖曰拉曰  
杖曰笞曰鎚擊曰刺曰幽曰凍曰疽發背曰慟哭統論  
之曰諸死者或假手於人或憤激自裁或罵賊畢命身  
死主寤者有之身死敵懼者有之身死家破者有之身  
死名榮者有之要與禽息烏視者遠矣其曰被犀甲操  
吳戈氣之雄騰天河驚廣野捐愛戚志之決頭匪恤我  
心赤我血碧長城雖壞白虹貫日則先生自道也先生  
之死有故人殮其尸而寄棺於佛寺寺燬於兵火棺亦

燔焉其家函所寄指葬之四明葛編修世振人之昭忠錄并銘其墓

黃端伯字元公建昌新城人崇禎戊辰進士除寧波推官改杭州歷禮部郎中南京既下死于市有瑤光閣集

元公近體瀏亮雖注意逃禪都無蔬筍之氣絕命詞云欲識分身處刀山是道場靈運可以作佛矣建德道中云青天霜氣迴匹馬立平沙遠道風千里寒城月萬家亂山盤徑險深樹引堤斜夙昔悲秋意偏於作客賒

陸培字鯤庭仁和人崇禎庚辰進士除行人家居

死難

大行風概自持卒蹈桐陽之節曩與陳公朱明以文社  
不相能大行既就義陳公亦赴越江以死曰吾生何面  
目見鯤庭於地下今兩公竝祀忠烈祠絕命詩云誰謂  
朝廷一命輕行人使節本皇明春秋官敘諸侯上周禮  
班從司馬名雍國尙慙收采石荆胥無計泣秦兵蕩陰  
徒有漚衣血烈帝孤臣恨未平

郝彪佳字幼文紹興山陰人天啓壬戌進士除興

化府推官選授福建道御史巡按蘇松改南京  
畿道以大理寺丞轉巡撫應天都御史謝病歸  
乙酉閏月自投寓園池中死

祁公美風采夫人商亦有令儀閨門唱隨鄉黨有金童  
玉女之目其司理莆陽也慮閩人語近侏離預遣人潛  
往買二鹿婢詢其鄉音及升廳事胥吏多操土語侮公  
公佯不知浹旬後按籍遍召在官人至一一聲其罪衆  
驚以爲神迨入爲臺諫卽進封事略云凡文武內外大  
小諸臣必使之安其位而後各盡其心邇來六卿九列

之長詰責時聞引罪日見因而周章急遽救過不遑竊  
恐當事諸臣悚於嚴旨冀以迎合揣摩善保名位臣所  
慮於大臣者此也人材中下參半藉上感發其忠義鼓  
舞以功名今司道有司或欽案之累由人或錢穀之輸  
未足降級住俸什居二三必至苟且支吾急功赴名之  
心不勝其掩罪匿瑕之念臣所慮於羣臣者此也陛下  
聞鼓鼙而思將帥之臣儻得真英雄卽推轂設壇夫豈  
爲過一或獎拔之術未盡則冒濫之竇將萌臣所慮於  
武臣者此也陛下深懲惰窳特遣內臣撫按之事多令



監視正恐同罪同功反使互蒙互蔽開水火之端其患  
顯啓交結之漸其患深臣所慮於內臣者此也其言切  
中思陵時弊故其後亡國卒由此數端云公嘗治別業  
于寓山極林壑之勝乙酉閏月六日坐園中題其案曰  
園功爲其難潔身爲其易吾爲其易者聊存潔身志舍  
笑入九泉浩然畱天地又書曰已治棺寄戴山戒珠寺  
可取以歛我是夜兄子鴻孫侍側夜分不寐公第曰君  
子之愛人也以德逮鴻孫倦隱几步至放生碣下投水  
昧且猶整巾帶立水中子理孫班孫葬之園旁舍池館

爲寺塑公像于堂至今存焉

劉宗周字啓東紹興山陰人萬歷辛丑進士授行人遷禮部主事歷光祿寺丞尙寶少卿太僕少卿引疾歸尋補右通政削籍起順天府尹再引疾歸起工部左侍郎以左都御史掌都察院事

乙酉六月不食死有蕺山詩集

先生家居恒服紫花布衣士大夫爭效之布爲長價吳江趙士諤知會稽縣事嘗問先生疾造榻前出而歎曰豈意今日得覩管幼安萬歷丁巳京察議及先生士諤

時爲考功郎爭曰劉大行之清修人所不堪此士諤之  
所親見者乃止吾鄉吳太常磊齋於天啓壬戌登第之  
前夢一隱者誦文信國山河破碎風漂絮身世浮沉雨  
打萍之句問其姓名曰劉宗周也太常不省時念臺先  
生以儀曹郎知貢舉相見驚訝其後交契靡間甲申之  
變太常死之逾年先生里居絕粒旬有四日而終遺詩  
云信國不可爲偷生豈能久予嘗造先生廬堂不過十  
笏京兆干旌尙存思陵曾賜勅云蔬食菜羹三月不知  
肉味敝車羸馬廿年猶是書生當之信可無忤酬別長

安故人云弱柳千章鎖鳳樓春風送客不勝愁杜門重  
憶十年病束髮誰先天下憂銷鑠壯心吾自老傍徨岐  
路子何求却教空谷傳驪唱落日浮雲滿帝州

溫璜初名以介字于石烏程人崇禎癸未進士除  
徽州府推官乙酉六月死于官有貞石堂集

溫公少孤母陸孺人鞠之破屋一間無帷帳姑沈病且  
餓同坐卧一板箱種火煨粥以爲食教其子讀書姑卒  
孺人哀毀如子天啓七年公請于有司聞于朝詔旌其  
節孝又一十八年而公成進士年六十矣司李徽州聞

國難恒引佩刀歎曰此身當付汝及城破先殺其女寶  
德次殺妻茅妻女皆延頸就死乃自刎公初名以介注  
名復社第一集不以兄在相位見擯于清流後禱夢於  
于忠肅祠夢忠肅語之云子不當名以介宜更曰璜遂  
更焉陸孺人著有家訓行於世

左懋第字仲及萊陽人崇禎辛未進士除澄城知  
縣選授戶科給事中歷刑禮兵三科升太常少  
卿巡撫都御史以兵部右侍郎兼都御史督師  
河北充通問使不屈誅

左公將北行貽書姜給事採大略謂國遭大故二東不聞有斷頭穴胸以報故君者彼鄒魯仁義之稱安在懋第此行是懋第死日也既入燕卒以閏月十九日死于市新城王尙書士禎池北偶談云公母徐寧海儒家女甲申京城陷從子懋泰載以歸行至白溝河仰天歎曰嗚呼此張叔夜絕吭處也呼懋泰前責以不能死國且日吾婦人身受國恩不能草間偷活寄語懋第勉之勿以我爲念言訖而死蓋出都不食已數日矣是母是子前史亦不多見

徐石麒字寶摩青浦籍嘉興人天啓壬戌進士除  
工部主事削籍崇禎初起補南禮部尋改吏部  
升南尚寶卿應天府丞歷吏部尚書有可經堂  
集

冢宰歸田之日築堂於郡榜曰可經人不解其故及乙  
酉城被圍公度必不能守步自東門入城破自經於堂  
始信公之就義立志已久蓋與昔賢止水之意吻合焉  
公古今詩俱新警不作規撫蹈襲之語鍾嶸詩品以落  
花依草喻邱遲公實似之黃州晚泊云赤壁雲初暝烏

林日漸紅波搖兩岍火人語隔江風夢鶴捎天路然犀  
逼水宮天寒游子意清夜月明中夜發靜海抵直沽云  
禾黍高低弄夕曛檣燈零亂破黃昏樹蒸夜氣三分雨  
帆裏秋烟一葉雲靜海金鉦鳴古戍直沽牙閫駐新軍  
援遼已竭東南力何日辰韓報策勛

項嘉謨字向彤一字君禹秀水人有讀選堂詞賦  
集

向彤投筆遠游渡河出塞尋入閩登武厓曹能始錄其  
詩人十二代詩選乙酉閏六月城破東平生所著詩賦



於懷投天星湖死子翼妾張從焉向彤墨林之孫賦性儻蕩不羈中歲產落歲辛巳年飢糧絕從父以五斗米貽之妾張爲執爨知向彤不甘澹泊以二升米易乾魚進飯向彤怒曰乾魚豈可下箸邪復以米三升易炙雞乃飯子家與向彤鄰竈婦述之以爲笑謂是希儼子弟粟果少年而視死如歸可敬也已

錢應金字而介一字仙上嘉興縣學生城被走村居游兵掠郊野見其髮未開剃遂見殺有書處

堂集

而介雅以詩詞名而今存者無幾題沈甫受蝶花居秋色詩云沈郎八詠世爭誇草色庭中不讓花秋氣逼人清入夢夢騎蝴蝶到君家邗溝云烟荒月淡古邗溝淮水遙連江水流六代繁華餘腐草至今螢火照揚州

侯峒曾字豫瞻蘇州嘉定人天啓乙丑進士除南兵部主事調吏部歷郎中出爲江西提學副使轉廣東右參政調嘉湖道升順天府丞歷左通政使乙酉秋縣城破赴水死

萊陽宋公繼登備兵嘉湖夜有白猿竊其衣冠服之搯

鼓升廳事時海寧袁秀才祿留公幕中猿人臥室披其  
帷秀才大愬公命隸卒環守而猿之往來如故也予童  
子曰偕諸昆弟行精嚴寺街人爭聚觀謂猿方坐鐘樓  
啖果子審視獨未之覩其後納言至止猿乃潛蹤又常  
熟時敏知海寧縣事夜草爰書有女子侍側磨墨問從  
何來曰鬼也敏既擢給事中代之者侯官林空鬼自是  
不復至侯公林令俱忠臣以此知邪不勝正理有然者

黃淳耀初名金耀字蘊生蘇州嘉定人崇禎癸未

進士乙酉家居城破自縊有陶菴詩集

夏允彝字彝仲號瑗公嘉善籍松江華亭人崇禎  
丁丑進士除長樂知縣以吏部行取補考功主  
事旋歸里乙酉南京下自投池水死

幾社六子瑗公以經義見長詩非專尙然其撰長樂志  
境有孝子節婦必賦詩以旌之集中樂府未嘗不合古  
人也野史述瑗公授命在乙酉五月第集有練川五哀  
詩按練川城潰乃是年七月五日瑗公尙存則止水之  
投當是松江失守之日爾

麻三衡字孟璿宣城人選貢生屯師姑山兵潰被

執死于市

孟璿注名復社遺賦無衣陳安未克生還狼曠已得死  
所詩如落日照荒野亡猿懷故林魂銷分劍日心折覆  
巢時草閣新寒入江邨落雁多一身去鄉土雙淚滿滄  
洲吳兒望歲唯呼雨楚客憂生盡憶家夢回塞上雙流  
淚家在淮南獨倚樓萬山茅屋白雲滿十里句溪紅葉  
飛殊自超超朗朗贈錢聖月云不寐成搔首蕭然獨寤  
歌霜天砧響急庭樹雨聲多酒力三更緩愁心萬緒過  
錢郎戀明主獻賦意如何

吳應箕字次尾貴池人縣學生乙酉死于難有樓

山堂前後集

先生羅九經二十一史于胸中洞悉古今興亡順逆之  
迹當崇禎中預慮燕都之必不能守聞者皆笑其迂而  
先生持論侃侃不阿也名雖不登朝籍而人材之邪正  
國事之得失瞭如指掌撰有熹朝忠節傳二卷兩朝剝  
復錄十卷畱都見聞錄三卷東林本末六卷續觚不觚  
錄二卷其書或傳或不傳覽者可以當龜鑑矣分宜張  
爾公稱先生人文似陳同甫是誠知言聞先生授命處

血迹至今猶存洗之不去萇宏稽紹而後不多得也練鄉勇云舊營非無兵府亦役健壯何如更選士不戰使敵創我聞逐賊師老弱匱轉餉馳騁梁楚交賊來不敢抗過掠虐貧民氣驕陵主將官兵終驛騷鄉勇新跌宕古人驅市人技藝隨所向今匪素拊循信以死長上里胥日催督閭閻相耀誑兵怒不可邇塗膏飭資仗區區賦幾何歲亦五千兩何以云何以使兵消莫如加派輟何以使賊平莫如官兵撤不見十年來請兵日不絕兵多賊亦多未見一賊滅賊去兵肆掠賊來兵不截撫軍

飾啞聾鎮帥類蹙躓塘報習爲欺上下徒牽掣終年庚  
癸呼竭盡民膏血我皇至神武羣臣亦憂愒事勢久凌  
遲相戒有卷舌雖我懷區區天遠何能說蘇州行云鱗  
諸要離死已久墓旁宿草兼衰柳斯民三代直道存肯  
使端人界虎口諸生大哭軍門前百姓呼號奮徒手須  
與緹騎鳥獸奔天子之詔吾何有爾時官長汗浹背縲  
臣夜半單舸走民間訛言屠一城聖人憫亂殲渠首嗚  
呼天下幾蘇州彙葬五人名不朽

祝淵字開美海寧人崇禎癸酉舉人有月隱先生



遺藁

崇禎壬午先生伏闕申救劉公宗周時未識劉公也及  
公罷歸始著錄稱弟子附舟南還已而緹騎逮入詔獄  
寇逼京師有詔赦出都城陷太常卿吳公麟徵殉之先  
生視含殮護其喪歸塗遇吳吉士爾壘斷一指寄其家  
先生爲攜歸畱都旣下先生葬其母尋自經死會劉公  
絕粒公弟子王毓著自投柳橋下遺書于公謂慎無爲  
王炎午所笑師弟之死蓋不出三旬也西湖月夜云落  
月鱗鱗水面浮露華濃滴桂叢秋不知何處鳴柔櫓驚

起一雙雪色鷗佛火漁燈漸寂寥推蓬起坐已中宵夜  
來極浦灘聲急知入西冷第幾橋

黃道周字幼元一字螭若漳州鎮海衛人天啓壬  
戌進士改庶吉士授編修歷中允以言事鐫級  
俄落職尋起官以諭德掌司經局再遷少詹事  
協理府事與經筵講隨謫江西布政司都事逮  
至京廷杖下詔獄遣戍福藩稱制進禮部尙書  
南京旣下猶督師出婺源師潰執繫故尙膳監  
不屈丙戌二月死于市有大滌函書浩然咏

詞臣無言責居无咎无譽之地需次待遷而已迨石齋  
先生入翰苑與上虞同年倪文貞公俱自任天下之重  
崇正去邪盡忠補過引裾折檻九死不回先生詩所云  
親從霹靂推車過又得滂沱自在春蓋實錄也及退而  
講學於杭則大滌洞天於閩則蓬萊峽少長咸集遐邇  
具來監史主賓琴瑟鐘磬庶幾濂雒之遺風焉先生璣  
象之學辭義深奧後生或昧其指歸詩才亦未免躋駁  
要其光燄不啻萬丈也曲周路皓月過銅山弔先生詩  
云道德公自重文章公自深若夫軍旅事似非公所任

用違其才此百世所惋惜者

靜志居詩話卷二十